

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 27/7

4 հոկտեմբերի 2016թ.

Քննարկվեց քաղաքացի Լարիսա Մկոյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 20.07.2016թ. թիվ 1470/02 որոշման դեմ:

Քաղաքացի Լարիսա Մկոյանի գանգատում բերված փաստարկները.

Լարիսա Մկոյանը (այսուհետ նաև՝ գանգատաբեր) 01.08.2016թ. ստացել է ՀՀ ԿԱ պետական եկամուտների կոմիտեի 20.07.2016թ. թվագրված հարկ վճարողից ժամանակին չվճարված հարկային պարտավորությունների գծով վճարման ենթակա գումարը գանձելու մասին թիվ 1470/02 որոշումը:

Որոշման համաձայն հարկային մարմնում առկա անձնական հաշվի քարտի տվյալների՝ 27.05.2016թ. դրությամբ Ա/Ձ Լարիսա Մկոյանի չկատարված հարկային պարտավորությունները կազմում են 188.678 ՀՀ դրամ եկամտային հարկի գծով, որից ապառք 121.925 ՀՀ դրամ, տույժ 66.753 դրամ, որն առաջացել է 2013թ. տարեկան հաշվարկից:

Արդյունքում որոշվել է Լարիսա Մկոյանից բռնագանձել 188.678 ՀՀ դրամ որպես պարտավորության գումար:

Գանգատաբերը գտնում է, որ նշված որոշումն անհիմն է և հանգեցնում է իր իրավունքների ոտնահարման, հետևյալ պատճառաբանությամբ.

Համաձայն ներկայացված 2013թ. տարեկան եկամուտների մասին պարզեցված հաշվարկի՝ 2013թ. եկամտային հարկի գումարը կազմում է 569.667 ՀՀ դրամ: Գանգատաբերի կողմից 31.05.2013թ. վճարվել է 140,242 ՀՀ դրամ և 429,426 ՀՀ դրամ, իսկ 31.01.2014թ.-ին՝ 307,500 ՀՀ դրամ:

Նշված հանգամանքը հաստատվում է համապատասխան հաշվի քաղվածքով: Սակայն անհասկանալի պատճառներով 31.05.2013թ. վճարված 429,426 ՀՀ դրամ գումարը չի արտացոլվել, որի հետևանքով վիճարկվող որոշմամբ առաջադրվել է լրացուցիչ պարտավորություն:

31.05.2013թ. վճարվել է ամբողջ հարկի գումարը 569.668 ՀՀ դրամ երկու վճարման հանձնարարականներով կատարված վճարումներով՝ 140.232 ՀՀ դրամ և 429.426 ՀՀ դրամ, սակայն հետագայում չհիշելով վճարում կատարելու հանգամանքը 31.01.2014թ. թյուրիմացաբար կրկին վճարվել է 307,500 ՀՀ դրամ, որը փաստորեն ավել վճարված գումար է:

Հաշվի առնելով վերոգրյալը՝ Լարիսա Մկոյանը խնդրում է հաշվի առնելով «Վարչարարության հիմունքների և վարչական վարույթի մասին» ՀՀ օրենքի 71-րդ հոդվածի պահանջներն անվավեր ճանաչել ՀՀ ԿԱ պետական եկամուտների կոմիտեի 20.07.2016թ. հարկ վճարողից ժամանակին չվճարված հարկային պարտավորությունների գծով վճարման ենթակա գումարը գանձելու մասին թիվ 1470/02 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննարկելով Լարիսա Մկոյանի վերաբերյալ վարչական վարույթի նյութերը պարզել է, որ համաձայն հարկային մարմնում առկա անձնական հաշվի քարտի տվյալների՝ 27.05.2016թ. դրությամբ նրա չկատարված հարկային պարտավորությունները կազմում են 188.678 ՀՀ դրամ եկամտային հարկի գծով, որից ապառք 121.925 ՀՀ դրամ, տույժ 66.753 դրամ, որն առաջացել է 2013թ. տարեկան հաշվարկից:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ԿԱ ՊԵԿ աշխատակազմի իրավաբանական վարչության պետի կողմից 20.07.2016թ-ին ընդունվել է թիվ 1470/02 որոշումը (այսուհետ նաև՝ Որոշում) Լարիսա Մկոյանից 188.678 դրամ պարտավորության գումար գանձելու մասին:

Տվյալ դեպքում Լարիսա Մկոյանի կողմից 2013թ. համար ներկայացվել է Տարեկան եկամուտների մասին պարզեցված հաշվարկ, որում վարձավճարից ստացված եկամուտը կազմում է 5.696.672 դրամ, իսկ դրանից պահվող եկամտային հարկի գումարը՝ 569.667 դրամ:

Սույն գործում առկա են «Էյչ-Էս-Բի-Սի Բանկ» ՓԲԸ միջոցով 31.05.2013թ. կատարված վճարման երկու հանձնարարականները, որոնց համաձայն 05.02.2013-04.05.2013թ.թ. ընկած ժամանակահատվածի համար Լարիսա Մկոյանի կողմից վճարվել է 10% եկամտային հարկ՝ գումարով 429.426 դրամ, իսկ 04.05.2013-31.07.2013թ.թ. ընկած ժամանակահատվածի համար՝ 140.242 դրամ, ընդամենը՝ 569.668 դրամ: Այսինքն, Լարիսա Մկոյանի կողմից վճարվել է 2013թ. Տարեկան եկամուտների մասին պարզեցված հաշվարկում արտացոլված եկամտային հարկի ամբողջ գումարը:

Ելնելով վերոգրյալից՝ Հանձնաժողովը գտնում է, որ Որոշման մեջ արտացոլված տվյալները՝ 27.05.2016թ. դրությամբ Լարիսա Մկոյանի եկամտային հարկի գծով չկատարված հարկային պարտավորությունները 188.678 դրամ կազմելու վերաբերյալ, հիմնավոր չեն և ենթակա են վերանայման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Անվավեր ճանաչել ՀՀ ԿԱ ՊԵԿ աշխատակազմի իրավաբանական վարչության պետի 20.07.2016թ. թիվ 1470/02 որոշումը:

Հանձնաժողովի նախագահ



Վ.ՄԻՐՈՒՄՅԱՆ